

LUTI

Luti'a mago Movapu nofi a kanomo mai'nigeno anau'amo'mo Maloni'mo Isaleli nofi vekamo mai'niyana ago fali'niye. Luti'e anofelo'amo'mo Neyomi'e'mo Isaleli kotegamo Metelehamu taonifi'mo u'ana mai'na'ageno Movasi'a Lutife'mo hau huno ateteno ha mae'niye. Movasi'a kagemi ya'a'e vekamo mai'neni Luti'a miya faino hatu maeno ate'nigeno Luti'a Movasite'mo maiteno ve mafa'nemo agi'amo Ometi'mo alino ate'niye. Ometi'a kini vekamo Nevini loto'amo'mo mai'niye. Luti'a agai'a nofi vaya'mo apataleno uno Movasi nofi vayapi'mo haino fale'niya kava hu'a Yesu'a miya faino hatu maeno apate'niya vaya'mogi Yesu nofi vayapi'mo hai'a nefalae.

Elimeleki'e afamo anaga a'e'mo Movapu kotegamo hage'a u'a mai'naya gemae

1 ¹Akeya'vilagamo agoti gemo ne'afiya vaya'mogimo Isaleli vaya'aite'mo yagai'a apate'nae. Ani afina'mo lusi kava hu'a ne'yafe'mo kafu hu'naya afina'mo afole ai'nigeno mago vekamo Metelehamu taonimo hanetegeni Yuta kotegamo mai'niya vekamo ataleno a'a'e mafa'ne'ala'e'mo apavaleteno hage'a u'a Movapu kotegamo mai'nae. ²Ani vekamo agi'amo Elimeleki'ae, a'amo agi'amo Neyomi'ae, mafa'ne'ala'mogani anaki'animo Maloni'e Kiliyoni'ene. Ani afamo anaga'mo Efalata nofi afamo anagane. ³Apakaemo Movapu kotegamo u'a mai'ne'apae'mo Elimeleki'a ago falitege'apae'mo Neyomi'a agai'age'mo mafa'ne'ala'e'mo magokepi lokae'a mai'nae. ⁴Lole mafa'nela'moganimo Movapu kote atala'mo alite'anae'mo mai'nae. Ani atala'ani anaki'animo Opa'e Luti'ene. Naya lole'a agufa kafugamo maite'apae'mo ⁵Maloni'e Kiliyoni'e'mo ago fali'nae. Falita'ageno'ae'mo Neyomi'a anau'amo'mogi mafa'ne'alanagi hu'a ago falitageno'ae'mo agai'age'mo mai'niye.

Neyomi'a Luti'mo avalelino uno Metelehamu taonifi'mo mai'niya gemae

⁶Neyomi'a Movapu kotega mai'neni'ae'mo afiyana Goti'a vaya'amo alagepa huno hapa mae'nigeno ne'ya'mo alagepa huno afole ai'niye, hu'a hu'naya gemo afi'niye. Agae'e anofelo'ala'mogani'e'mo visayafe'mo alo hu'nae. ⁷Yuta kotega ugefe'mo kategamo magokepi

lokae'a ne'u'apae'mo ⁸ Neyomi'a anakaefe'mo, Kotanilegamo aitana atagi netana itatanimogani'e'mo mai'ao. Alagepa kava'mo hutana yagaitana natetetana fali'na'a anautanila'mogani'e'mo alagepa hutana yagaitana anate'na'ae. Ani kava huno Goti'a alagepa kava huno yagaino lanatenagetana mai'ao. ⁹ Ala kava ne'mo'a alagepa huno lahana maenagetana utana alu vekalate'mo maitetana alagepa hutana mai'ao, huno hana paiteno hanaeno ne'nige'anae'mo lusi kava hu'ana avi'ya hu'na'ae. ¹⁰ Hute'anae'mo, ha'ao, Kage'eke'mo lokaeta vayakalegamo ugune, hu'ana ¹¹ ha pai'na'ageno'ae'mo, Nanofelo'nila'moganitanae, huno, afa'a atagi netana vi'ao. Na kava higetanae'mo nage'e'mo magokepi lokaeta ugune, hutana neha'ae. Mago'e hu'na halate ve mafa'nela'mo ali'na anatesugetana ani vekalate'mo maiga'afiye. ¹² Ha'ao, Ago anekalomo le'novanage'na vele'mo afa'a o'maiguvanagi ataletana aitana atagi netana kotanilegamo vi'ao. Hemeni hani'ilagamo vele'mo maite'na ve mafa'nela'mo ali'na anatesuge'ana ¹³ kosisa'afe'mo anakava maisa'afe'mo neha'afiye. Anakava o'maitana utana alu vekalate'mo maiga'ae. Ha'ao, kanale osugiye. Ala kava ne'mo'a nagaetegamo hosu kava'mo hu'nige'nae'mo nahau hu'na nelanatove, huno hana pai'niye. ¹⁴ Ani gemo hu'nige'ana afite'anae'mo mago'e hu'ana avi'ya hu'na'ae. Opa'a anofelo'amo'mo haeno neteno ataleno u'niya'monanafa Luti'a ataleno o'u'niye. ¹⁵ Neyomi'a Lutife'mo, Kaganakamo'mo ago kataleno nofi vaya'alega'e goti'amotega'e'mo u'niye. Age'e'mo kotanilegamo vi'ao, huno ha pai'nigeno ¹⁶ Luti'a, nagaefe'mo, Nataleka uvo, huka osuvo. Nage'e'mo lokaeka o'ugane, huka huteka huka natafauka o'nato. Haiya kotegamo visapi nage'e'mo afa'age'mo ugu'ae. Haiya kotega uka maisapi nage'e'mo uta'age'mo maigu'ae. Vayakamo vaya'nige'mo maigae. Gotikamo'mo Goti'nimoke'mo maigiye. ¹⁷ Haiya kotega uka mai'neka falisapi nage'e'mo ani kotegamo u'na mai'ne'na falisuge'a ali'a ki'a nategae. Falisu'a kava'moke'mo la'agaemo alino fako huno la'ategaiye. Alagi lama gemo nehuve. Ani kava'mo osisuva'mo'mo Goti'a lusi kava huno hanageke ya'mo namigiye, huno huteno ago'ya atale'niye. ¹⁸ Luti'a lusi lokiya gemo huno, ugu'ae, huno ha pai'nigeno'ae'mo Neyomi'a ge osu'niye. ¹⁹ Anakaemo u'ana Metelehamu taonifi'mo ava'yi hu'na'age'apae'mo muki ani taonifi a'ne anaga'mogimo agete'apae'mo, Ani a kanomo Neyomi'a ne'efi, hu'a hute'a hapau ai'nae. ²⁰ Neyomi'a, Nagaefe'mo Neyomiyo, hutapa nagi o'aeyo. Ala kava ne'mo'a nagaetegamo hosu kava'mo hu'niya'mofe'mo Mala'ae, hutapa nagi aeyo, huno hapa pai'niye. (Neyomi'ae agimo aepa'amo amogaga ne'aiya ane. Mala'ae agimo aepa'amo hosu aipamo nekaliya ane.) ²¹ Neyomi'a, Mani koteti'mo atale'na u'nova afina'mo anau'nimo'e mafa'ne'nile'mo magokepi lokaeta u'none. Muki ya'nimo alini'na u'nova'monanafa Ala kava ne'mo'a navalelino ege'na nagufa'age'mo ne'ove. Ala kava ne'mo'a

lusi kava huno hanageke ya'mo alino nami'niya'mofe'mo Neyomi'a amogaga ne'aiya a kanoe hutapa nagi o'aeayo, huno hapa pai'niye. 22 Ani kava hu'ana Neyomi'e anofelo'amo'mo Movapu kotega a kanomo Luti'e'mo Movapu kotegati'mo e'ana mali ne'ya'mo laisigana ya'mo ago le'nige'a nehatagaya afina'mo Metelehamu taonifi'mo e'ana ava'yi hu'na'ae.

Luti'a Movasi hoyalegamo u'niya gemae

2 ¹Neyomi negafo'amo agi'amo Movasi'ae. Ani vekamo ala agi vekamo mai'nenoyomi anau'amo'mo fali'niya vekamo Elimeleki nofi vayapati vekamo mai'niye. ²Luti'a Neyomife'mo, Hoyalegamo ute'na mali avoyamo hatagau'a atalesaya mali alagamo alime alime uguve. Mago vekamo'mo he, kanalene, huno hisige'na aiyaka ali'na alime alime visuvana kanalepiye, huno afi ge'nigeno'ae'mo Neyomi'a, he kanalenagi, nanofelo'nimogamo afa'a uka ani kava huvo, huno ha pai'niye. ³Ha pai'nigeno Luti'a hoyalega uteno mali avoyamo hatagau'a ataleme u'naya vaya'ai apaiyakamo alino alime alime u'niye. Ina la hoyafi'mo e'na mai'nofi huno agesamo o'afi'niyana Movasi'a Elimeleki nofi vayapati vekamo hoyafike'mo eno ali'ya'mo ali'niye. ⁴Ali'ya'mo ne'aligeno'ae'mo Movasi'a Metelehamu taonifati'mo eno ava'yi huteno ali'ya'amo ne'aliya vaya'aife'mo, Ala kava ne'mo'a lapakae'e'mo magokepi lokaeno maino, huno ke apamamae'nige'apae'mo ge'ale'mo ae'a atagaina hu'a, Ala kava ne'mo'a kaha maeno, hu'a ha pai'nae. ⁵Movasi'a kava ne'ae'mo, Uma venemo a kanomo haiya kotega a kanoe, huno ⁶afi ge'nigeno'ae'mo, Alu kotegati'mo Neyomi'e'mo lokaeno e'niya a kanomo Movapu kotega a kanomo mai'niye. ⁷Netepi'mo eno nagaefe'mo, Ali'ya'mo ne'aliya vaya'ai apaiyakamo ali'na mali avoyamo alime alime ugesuve, huno ge huno nafi ge'nige'nae'mo he, hu'na ha pai'nogeno ali'ya'mo alime alime eno hememitomo uluna nopi'mo maino falu hu'niye, huno ha pai'niye. ⁸Movasi'a uno Lutife'mo, Ge'nimo alagepa huka afiyo. Uka alu vaya'ai hoyafati'mo mali avoyamo alika anupa osuvo. Mani hoyafike'mo ali'ya'nimo ne'aliya a'ne anaga'e'mo magokepi lokaeka ali'ya'mo aliyo. ⁹Malimo nehatagaya vaya'mo haiyate'mo ali'ya'mo ne'alifigi apakeka alagepa hu malo. Apaketekae'mo ali'ya'nimo ne'aliya a'ne anaga'mo apakame huka magokepi lokaeka ali'ya'mo aliyo. Nagae ali'ya'mo ne'aliya neya vaya'aife'mo, Hanageke ya'mo o'amiyo, hu'na ago hapa pai'nove. Anife'mo kahausigekae'mo uka yafa kepi'mo he fili e'a male'naya aniteti'mo alika no, huno ha pai'niye. ¹⁰Ha pai'nigeno Luti'a ape huno mopafi'mo ale'ya faino mai'nenoyomi'ae'mo, Nagaemo alu kotega a kanomo mai'novamonanafa na kava higekae'mo alagepa kaulagamo ne'nagane, huno ha pai'nigeno ¹¹Movasi'a, Anaukamo'mo ago fali'nigeka kanofelokamofe'mo alagepa huno kahau'niya kavafe'mo kava gemo ago afi'nove. Afi'novana kokamogi itaka afokamogimogi huka ago apataleteka o'apake'nana

vaya'e'mo mai'nane, hu'a kava gemo hu'nage'na afi'nove. ¹²Ala kava ne'mo'a kaha maeno kamisigeka maiyo. Kagaemo eka Ala kava ne'mo Isaleli vaya'ai Goti'apimo hakufi'mo fala ki'nananageno alagepa huno yagaino kategaiye, huno ha pai'niye. ¹³Ha pai'nigeno Luti'a, Nagaemo ina agufa a kanomo mai'ne'na kagae ali'ya'mo no'aluva a kanomo mai'nova'monanafa kaipamo'mo falu huka nate'nane. Aise gemo nehana ge'mo'mo alika lokiya vaika ne'nataane, huno ha pai'niye. ¹⁴Ne'ya'mo ne'ne'apae'mo Movasi'a Lutife'mo, Eka peleti mayamo alika nofi alagafati anipi'mo aeteka no, huno ha pai'niye. Luti'a ali'ya'mo ne'aliya vaya'e'mo itopale mai'nageno'ae'mo Movasi'a mali alagamo ago kae male'naya mali alagamo alino ami'nigeno neno amu hu'nigeno mago ne'ya'amo afa'a hane'niye. ¹⁵Mago'e huno mali avoyamo alino anupa hisiyafe'mo he tino u'nigeno'ae'mo Movasi'a ali'ya'amo ne'aliya vaya'aife'mo, Mali hayamo ne'malaya yate'mo mago atale'nisaya mali avoyamo afa'a aligiyalagi ge ohaiyo. ¹⁶Mali hayafati'mo mago alita halautapa male'nisageno alisigetapae'mo ge ohaiyo, huno hapa pai'niye. ¹⁷Ani ge hu'nigeno'ae'mo Luti'a mali avoyamo alino anupa hume hume ne'vigeno'ae'mo yegemo lamino fale'niye. Kayoteti'mo alino amagi'nigeno mali alaga'age'mo mopafi'mo asagauno ai'nigeno kupi'mo alino ku ai'nigeno laisi kukana huno lusi kana hu'niye. ¹⁸Taonifilagamo alinino uno anofelo'amo'mo ave liteno'ae'mo Movasi'a ami'nigeno neno amu huteno ali'niya ne'ya'e'mo alino anofelo'amo'mo ami'niye. ¹⁹Neyomi'a Lutife'mo, Hemenimo mali avoyamo haiyateti'mo ali'nane. Ina la hoyafi'mo ali'ya'mo ali'nane. Ala kava ne'mo'a kaha mae'niya vekamo ha maeno amino, huno ha pai'nigeno, Mago vekamo agi'amo Movasi hoyafi'mo ali'ya'mo ali'nove, ²⁰Huno ha pai'nigeno Neyomi'a, Ala kava ne'mo'a ha maeno amino. Ala kava ne'mo'a fali'naya vaya'aitega'e afa'a ne'maiya vaya'aitega'e'mo ani kava huguve, huno hapa pai'niya kava'mo age okani'nigeno nehiye. Ani vekamo negafoti'amo'mogeno la'aha maesiya vekamo mai'niye, huno ha pai'niye. ²¹Huno ha pai'nigeno Luti'a Movapu kotega a kanomo'mo huno'ae'mo, Movasi'a alagepa huno naha maeno naha paino'ae'mo, Ali'ya'nimo ne'aliya a'ne anaga'e'mo lokaeka mali avoyamo aliyo. Alime alime ne'uge'apao ani ali'ya'mo ali'a hano hiyo, huno naha pai'niye, huno ha pai'niye. ²²Neyomi'a Lutife'mo, He, Nanofelo, huno, Alu vekamo hoyalegamo visana'mo'mo mago vaya'mo kagaetegamo egae. Movasi hoyalega uka a'ne anaga'e'mo magokepi lokaeka ali'ya'mo alisana'mo'mo alagepa huka maigane, huno ha pai'niye. ²³Inagi Luti'a apakae'e'mo ali'ya'mo alime alime ne'vige'apae'mo mali avoyamo hatagau'a hano huge viti avoyamo hatagau'a hano huge hu'nae. Luti'a ali'ya'mo ne'alino'ae'mo anofelo'amo'e'mo lokaeno mai'niye.

Luti'a Movasitegamo u'niya gemae

3 ¹Neyomi'a Lutife'mo, Nanofelo, huno, kagaemo mago vekamo'mo aliteno alagepa huno yagaino katesigeka kanale huka maisanafe'mo

nahau'niye. ²Ani vekamo Movasi'a negafokamo'mo mai'niye. Ali'ya'amo ne'aliya a'ne anaga'e'mo lokaeka ali'ya'amo ali'nana vekamo mai'niye. Hemeni hani'ilagamo ve anaga'mogimo mali alaga'e haleti'ya'a'e'mo sipetileti'mo fai'a kate'a koku'napi'mo yaga yaga hisageno yasimo'mo haleti'ya'amo alino halelino ne'visigeno alaga'age'mo mopafi'mo asagauno aigiye. Movasi'a ani ali'ya'mo alisayategamo uno maigiye. ³Uno mai'nisigekae'mo ani'mo faletaleka alagepa atumo ne'aiya uvelimo faleteka hogote alagepa kukenakamo alika vaika aliteka ali'ya'mo ne'alisayategamo uka maiyo. Ukae'mo uka aulagale'mo afole o'aika mai'negeno'ao ne'ya'e ani'e'mo neno hano hino. ⁴Neno hano huteno'ae'mo haino havaegefe'mo hisigekae'mo haino havaesiya ya'amo ageka alagepa hu male'neka havae'nisigekae'mo palaketimo alika asaga huli'neka aiyalegati'mo faleka haika aiya afafale'mo havao. Henaga'amo ina kava huvo, huno kaha paigiye, huno ha pai'niye. ⁵Luti'a, He kanalenge'na muki hana gemo alagi akame huguve, huno ha pai'niye. ⁶Inagi ali'ya'mo ne'aliyategamo uno'ae'mo muki anofelo'amo'mo ha pai'niya gemo akame huno hu'niye. ⁷Movasi'a ne'ya'mo nege ani'mo nege hu'nigeno'ae'mo aipamo'mo kanale hu'nigeno uno mali alagamo male'naya yategamo havae'niye. Au kale'nigeno'ae'mo Luti'a sako huno uno palaketimo alino asaga huli'neni aiyalegamo faleno haino havae'niye. ⁸Movasi'a au kale'neni'ae'mo hani'ilaga folagu'mo aino afe leno havaeyategamo a kanomo eno havae'nigeno ageteno'ae'mo hau ai'niye. ⁹Hau aiteni atete nehuno'ae'mo ina lagae, huno afe ge'nigeno'ae'mo, Ala nene, huno, Nagaemo Luti'nage'mae. Negafo'nimogamo mai'nana'mofe'mo kukenakaleti'mo alika kofika nato, huno ha pai'nigeno ¹⁰Movasi'a, Ala kava ne'mo'a alagepa huno kaha maeno kamino. Hemenimo nehana kavakamo'mo kanofelokamo'e'mo mai'nekae'mo nehana alagepa kavakamo ago aeno aga se'niye. Asole neya vaya'mo mai'ne'a mago neya vaya'mogi kagemi ya'apimo hanege mago'amogi ohanega hu'niya vaya'mo mai'nayanageka mago neya vekale'mo maiguve, huka kagesamo o'afi'nane. ¹¹Muki mani kote ve a'nemogimo kagaemo kage'nayana kanale a kanomo mai'nane, hu'a ago kage'naya'mofe'mo koli osuvo. Naha pai'nana gemo afi'novanage'na kaha paigesuve. ¹²Negafokamo'namo mai'novanage'na miya fai'na hatu mae'na katesuva vekamo mai'nova'monanafa mago hogote vekamo negafokamo'mo maitege'na agae akamelegati vekamo nagaemo mai'nove. ¹³Hemenimo manile havae'nege'nao egamo u'na aipa agesae'mo afe gegauve. Yagai'na kategauve, huno hisiyana kanalene. Agaemo, yagai'na okategauve huno hisiyana nagaemo afa'a yagai'na kategauve. Goti'a mai'niye, hu'a alagi lama gemo nehaya kava hu'na lama gemo kaha nepauve. Hemenimo halate ago havae'negeno kotino, huno ha pai'niye. ¹⁴Luti'a halate havaeteno kotino ha ole'nigeno'ae'mo ve a'nemogimo

o'agesayafe'mo ago he tino u'niye. Movasi'a vaya'mogimo Luti'mo agesayafe'mo ohau'niya'mofe'mo hanipi'mo he tino u'niye. ¹⁵Movasi'a Lutife'mo, lavolavokamo alika ataleka yakai maleno, huno ha pai'nigeno Luti'a alino ataleno yakai male'nigeno laisi kukana ya'mo alino aeno laku faeno maleteno alino asaga huno kofino ate'niye. Kofino ate'nigeno kofilino taonifilagamomo hai'niye. ¹⁶Luti'a haino anofelo'amotegamo ava'yi hu'nigeno'ae'mo, nanofelo, ago ne'apiye, huno afi ge'nigeno'ae'mo Luti'a Movasi'mo muki ha mae'niya gemo ava ge huno ha pai'niye. ¹⁷Ha paiteno mago'e gemo ha paino'ae'mo, Movasi'a mali alagamo alino namiteno'ae'mo, Kanofelokamotegamo kagufa'ageke'mo o'uka ne'ya'eke'mo alinineka uvo, huno naha pai'niye, huno ha pai'nigeno ¹⁸Neyomi'a, ani kavafe'mo kahausoli osuka haiya kava'mo afole aisifigi aise afina'mo afa'a agava maiyo. Movasi'a hemenimo afa'a no'maigaifa ani kava'mo alino alagepa huno ne'ategaiye, huno ha pai'niye.

Movasi'a Luti'mo ali'niya gemae

4 ¹Movasi'a taonimo yafa lafi kegi'yale'mo ali'a anupa hu'a ne'maiya yate'mo uno itopale'mo mai'niye. Mai'nigeno mago vekamo Elimeleki nofi vayapati vekae'mo Movasi'a ava gemo hu'niya vekamo ne'egenom ageteno Movasi'a keya aeno ge huno'ae'mo, Ve'nimo, huno, Eka manile'mo itopale'mo maiyo, huno ha pai'nigeno eno itopale'mo mai'niye. ²Movasi'a naya lola'vayayata vaya'mo taonifi'mo ne'yagaiya vayayata vaya'mo apavalelino e'nige'a magokepi itopale'mo mai'nae. ³Mai'ne'apae'mo Movasi'a agai'a anaga vayapati vekae'mo, Neyomi'a Movapu kotegati'mo ataleno eno manile'mo mai'niye. Elimeleki'a ago falitegenom Neyomi'a Elimeleki mopamo la'agae anaga vayapati vekamo mopa'amo maketi hisiyafe'mo hau'niyanage'na mago gemo kaha paigesuve. ⁴Kagaemo miya faika hatu maeka atesanafe'mo kahau'nisiyana mani vaya'ai apaulagale'mo miya faiyo. Kagaemo miya faisanafe'mo hogote vekamo mai'nanage'na kagae kakamelegati vekamo nagaemo mai'nove. Inagi miya fai'na hatu mae'na ategaave, huka hisana'mo'mo naha paiyo, huno afi ge'nigeno, miya fai'na hatu mae'na ategaave, huno ha pai'niye. ⁵Movasi'a, Neyomiteti'mo mopamo miya faisana'mo'mo Luti'mo Movapu kotega kogu a kano'e'mo miya faigane. Fali'niya vekamo nofi vaya'amogi mopamo hanesiyafe'mae, huno ha pai'nigeno, ⁶Nagaemo afa'a miya fai'na hatu mae'na o'ategaave. Falitesuge'apae'mo mafa'ne anaga'nimogi o'alisayana kanale osugiye. O'nahaiyanagi kagaikage'mo miya faiyo, huno ha pai'niye. ⁷Akeya'vilagamo Isaleli vaya'mogi hu'naya kava'mo hane'niyana mago ya'mo miya fai'a hatu mae'a ate'naya afina'mo ani vaya'mogimo apaiyaleti'mo su'apimo asagi'a ne'apamiya kavane. Isaleli vaya'mogimo ani kava'mo ago alita kanale hu'none, hu'a hute'a nehaya kava'mo

hane'niye. ⁸Ani kava'mo hane'niya'mofe'mo ani vekamo'a Movasife'mo, Miya faiyo, huno ha paiteno'ae'mo aiyaleti'mo su'amo asagino ami'niye. ⁹Movasi'a ne'yagaiya vayatama vaya'e muki vaya'efe'mo, Muki'amogitapamo ani kava'mo ago age'nae. Hogoteno Neyomi'a Elimeleki yatenagi Kiliyoni yatenagi Maloni yatenagi huno muki ya'apile'mo yagai'niye. Hemenimo nagaemo muki ya'apimo ago miya fauve. ¹⁰Ago miya fauva'mofe'mo Luti'mo nagai'ni a'mo maiye. Maloni'a ani a kanomo Movapu kotega a kanomo ali'niyateti'mo ago ataleno fali'niya a kanomo nagaemo ago aluve. Aluva'mofe'mo Maloni anaga vaya'ai mopamo hanegaiye. Maloni anaga vaya'mo fali'a hano osu'a maige maige hu'a maigae. Hemenimo lapakaemo mani nehuva kava'mo ago age'nae, huno hapa pai'niye. ¹¹Ne'yagaiya vayatama vaya'mogi'e'mo, He, ago age'none. Ala kava ne'mo'a ani nokafi'mo esiya a kanomo alagepa huno yagaino ate'nisigeno asole mafa'nemo Yekopu atala'mo Leso'e Liya'e'mo ali'ana apate'na'a kava huno asole mafa'ne anaga'mo alino apategaiye. Ala kava ne'mo'a kaha maenageka Efalata nofi vayapati'mo kagemi yaka'e vekamo mai'neka ala kagi vekamo maiyo. ¹²Ala kava ne'mo'a kaha maenage'a mafa'ne anagakamogimo Pelesi nofi vayapati'mo Yutagani Temagani mafa'ne anaga vayakana hu'a maigae, hu'a ha pai'nae. ¹³Movasi'a Luti'mo ali'nigeno Ala kava ne'mo'a Luti'mo alagepa huno ha mae'nigeno aipagu'e'mo maiteno ve mafa'nemo alino ate'niye. ¹⁴A'ne anaga'mogimo Neyomife'mo, Ala kava ne'mo agi'ale'mo alita asaga higetao. Ala kava ne'mo'a ve mafa'nemo kami'niyanageno hemenimo miya faino hatu maeno latesiya vekamo mai'niye. Ani mafa'nemo ala agi vekamo maino. ¹⁵Kanofelokamo'mo kagaefe'mo hau ayamopafi'mo hau'nigeno alagepa huno kaha ne'maeya'mofe'mo seveni'a ve mafa'nemo alika apate'nanesinana ago aeno apaka se'niyesine. Agaemo alino ate'niya ve mafa'nemo'a alagepa huno yagaino kategaiye. Anekalomo ago le'nananageno alagepa huno yagaino kategaiye, hu'a ha pai'nae. ¹⁶Inagi Neyomi'a ani ve mafa'nemo avaleno anu kiteni yagaino ate'niye. ¹⁷Ani kote a'ne anaga'mogimo agi'amo Ometi'ae hu'a ate'nae. Muki vaya'aife'mo, Neyomi'a ve mafa'nemo ago alino ate'niye, hu'a hapa pai'nae. Henaga'amo Ometi'a Yesimo alino ate'nigeno Yesi'a Nevini'mo alino ate'niye. ¹⁸⁻²²Pelesi aginago vaya'mogi apaki'apimo hane'niye. Ani vaya'ai apaki'apimo Pelesi'a Hesaloni'mo alino ate'nigeno Hesaloni'a Lamo'mo alino ate'nigeno Lamo'a Aminanapu'mo alino ate'nigeno Aminanapu'a Nesoni'mo alino ate'nigeno Nesoni'a Samoni'mo alino ate'nigeno Samoni'a Movasi'mo alino ate'nigeno Movasi'a Ometi'mo alino ate'nigeno Ometi'a Yesi'mo alino ate'nigeno'ae'mo Yesi'a Nevini'mo alino ate'niye.